

እንኳን ለብርሃን ጥምቀቱ አደረሳችሁ።



ጥምቀት ዋይ ዜማ :-

ሐዳፌ ነፍስ ለዳድቃን ወተስፋ ቅቡፃን ክርስቶስ አስተርአየ ውስተ ዓለም
እምድንግል ተወልደ ክሡተ ኮነ እንዘ ይትዔዘዝ ለአዝማዲሁ ከዊኖ ሰብአ
በዮርዳኖስ ተጠምቀ ፡ ፡

ምልጣን :-

እምድንግል ተወልደ ክሡተ ኮነ እንዘ ይትዔዘዝ ለአዝማዲሁ

ማንሻ :-

ከዊኖ ሰብአ በዮርዳኖስ ተጠምቀ ፣

ከዊኖ ሰብአ በዮርዳኖስ ተጠምቀ ፡ ፡

ሰላም :-

ሃሌ ሃሌ ሉያ ሃሌ ሃሌ ሉያ በሰላም አስተርአየ ወልደ አምላክ ፍጹም
ወተወልደ በሀገረ ዳዊት በዮርዳኖስ ተጠምቀ ከመ ይቤዝውነ ወልደ አምላክ
ፍጹም አስተርአየ ፡ ፡

ተሣሃልክ እግዚኦ ምድረክ :- ምራ

ዝማጫ :-

አርዕየነ እግዚኦ ሣህለክ ሃሌ ሉያ
ወረደ ወልድ እምሰማያት ውስተ ምጥማቃት በፍሥሐ ወመሰላም ፡ ፡

ምልጣን :-

በፍሥሐ ወበሰላም ወረደ ወልድ እምሰማያት ውስተ ምጥማቃት ፡ ፡

አመላለስ :-

በፍስሐ በፍሥሐ ወበሰላም

ወልድ ወልድ ወረደ ፡ ፡

ማጎሌት ዘነግሀ :-

ስምዓኒ እግዚአ ጸሎትየ

ሃሌ ሉያ ሃሌ ሉያ

ወይብጻሕ ቅድሜክ ገዓርየ

ሃሌ ሉያ ሃሌ ሉያ

ወኢትሚጥ ገጸክ እምኔየ

በዕለተ ምንዳቤየ አፅምዕ ዕዝነክ ኃቤየ

ሃሌ ሉያ ሃሌ ሉያ

አመ ዕለተ እጼውአክ ፍጡነ ስምዓኒ

ሃሌ ሉያ ሃሌ ሉያ

ለዓለም ወለዓለመ ዓለም

ሃሌ ሉያ ዘውእቱ ብሂል

ንወደሶ ለዘሀሎ እግዚአብሔር ልዑል

ማንሻ :-

ስቡሕ ወውዱስ ዘሣረረ ኩሎ ዓለመ

በአሐቲ ቃል ::

መልክእ ሥላሴ :-

ሰላም ለአእዛኒክሙ ኦናቅጸ ጸሎት ሠናይ ፣
ምሥጢራተ ሰሚዕ ሥላሴ ዘይተልዎ ርእይ ፣
በአብትረ ያዕቆብ በርሀ ሥላሴክሙ ፀሐይ ፣
ወተመሰሉ ሰብአ ዓይን አባግዐ ላባ ወማይ ፣
ለኅበ አባግዕ ዘዮም ወጥምቀት ዓባይ ::

ዚቅ :-

መኑ ይወርድ ውስተ ቀላይ ክርስቶስ ውእቱ ዘወጽእ እማይ እመንፈስ ቅዱስ
፫ቲሆሙ እለ አሐዱ እሙንቱ ፫ቲሆሙ እለ ይከውኑ ሰማዕተ ፫ቲሆሙ
ለሊሁ ወረደ መንፈስ ቅዱስ ከመ ይቀድስ ማያተ ሰቡሕኒ ውእቱ ወልዑልኒ
ውእቱ ለዓለም ጸጋ ወጽድቅስ በኢየሱስ ክርስቶ ኮነ ::

ነግሥ :-

ሰላም ለማየ ዮርዳኖስ ዮሐንስ ዘአተቦ ፣
መንፈስ ቅዱስ ከመ አጥበቦ ፣
ሶበ መጽእ ቃል እምሰማይ ለተናብቦ ፣
ነድ ለማየ ባሕር ከበቦ ፣
ማይ ኅበ የሐውር ፀበቦ ::

ዚቅ :-

ርእዩከ ማያት እግዚኦ
ርእዩከ ማያት ወፈርሑ
ደንገፁ ቀላያተ ማያት ወደምፀ ማያቲሆሙ ::

የትምሕርተ ጎቡዓት መግቢያ :-

አስተርእዮ ኮነ በል.....

በእንተ ትምህርተ ጎቡዓት

በእንተ ትምህርተ ጎቡዓት ቅድመ ዘትትነገር እምጵርስ ፎራ ለምዕመናን ጎቡዓት ትምህርተ ጎቡዓትስ ከመዝንገር ዘቅድመ ሀሎ ወይሄሉ ዘመጽኦ ዘሐመ ወሞተ ወተቀብረ ወተንሥኦ ሳዕረ ዘሞት ፈትሐ ወዘእሙታን ተንሥኦ ::

ኢኮነ ባሕቲቶ ከዊኖ ሰብኦ ዘእመንፈስ ቅዱስ ሥጋሁ ለአዳም ምስለ ነፍሱ ዘኢኃደገ ነፍሱ ውስተ ሞት ዘበመንፈስ ለአዳም ፀወኑ ወአሕየዎ ::

ዘለብሶ ለአዳም መዊቶ ሐይወ ዘዐርገ ውስተ ሰማያት ተዋሪዶ ለሞት እምድኅረ መስቀል ሞዒ በቲኮ ማዕወሮ ለሞት በእንተ ዘተኅየለን ዲያብሎስ ትካት በዝንቱ በእንተ ሕማሙ ኦርእየን መስናሁ በቲኮ ጎምዘ ኃይሉ ወጠጠ መሥገርቶ ::

ወገጹ ዘፍጹም በጽልመት ፈርሃ ወደንገፀ ዲያብሎስ ርእዮ ብሑተ ልደት በሥጋ አምላክ በሲኦል ::

ወሪዶ ዘእምልዑላን ሰማያት ዘኢይትነገር ወሪዶ ሕሊናሁ ዘኢይትከፈል በአሐቲ ምክር ምስለ አቡሁ ሰማያተ ገብረ ምስለ አቡሁ አክሊሎሙ

ለመላእክት ወለሊቃነ መላእክት ኃይል ለኃያላን አጽፍ ወለአጋዕዝት መንፈስ ዘእምቅድመ ዓለም መንግሥቱ ሰፋኒት ለቅዱሳን እዘዝ ::

ኅሊናሁ ለአብ ዘኢይትረከብ ውእቱ ጥበቡ ለአብ ውእቱ ኃይሉ ውእቱ የማኑ ውእቱ ምክሩ ውእቱ ኅሊናሁ እደ መዝራዕት ዘአብ ከዊኖ እንከ ::

እንዘ ነአምን በሃይማኖቱ ንገኒ ከመ ውእቱ ብርሃን ሕፀበተ መድኃኒት ምስዋር ረድኤት ወመምሕር ዘይትቃወምለን ዘየዓሢ ተወካፊ ምጽንዓተ ቅጽርነ ውእቱ ኖላዊ ጥጎት አንቀጽ ፍኖተ ሕይወት ፈውስ ሲሳይ መስቴ መኰንን ::

ነአምን ሕማሞ ለዘኢየሐምም ዘተወለ በሥጋ ዘኢይትወለድ መዊቶ ሕያው ወልደ አብ ተገምረ ዘኢይትገመር ዘኃጢአተነ ነሥአ እንዘ አልቦ ኃጢአት መዊቶ ሐይወ ::

እምሰማያት

እምጎበ አብ አይጎዓ

በሕማማተ ሥጋሁ ቤዘወነ

ወደሞ ክቡረ መንፈስ ሕይወት ወቅድሳተ መንፈስ ወጎበነ

ወማየ መንጽሔ ዚአነ ::

ዘያበርህ ውስተ አልባቢሆሙ ለእለ ይፈርህዎ እስመ ምስሌሆሙ ለዝላፋ ሀሎ ዘረሰየን ነኪራን እምኩሉ ፍኖተ ሰይጣን ኃዳፌ ነፍሳት ዘቦቱ ኩልን ንትዌከል ዘንተ አምላክ ::

ከዊኖ እምቅድመ ዓለም ምስለ ኡብ ርእዮ ለዓለም በማዕሠረ ኃጢአት እንዘ ይትኅጎል በኃይለ ጥበቡ አርዌ ይትከየድ በኢያእምሮ ጌጋይ ለሞት ተቀንየ ::

ፈቂዶ ይፈውስ ትዝምደ ሰብእ ተገምረ በማኅፀን ድንግል ተኅቢኦ ለኩሉ ኃይል እለ በሰማያት ማኅደር ወለእለ ይትቃወማ ኃይል በኢያእምሮ ሠወሮሙ ::

ሥጋ ለብሰ ዘይማስን ወዘኢይማስን ለሥጋ መዋቲ ረሰዮ ዘኢይማስን ዘበአርአያ ሥጋ ዘመዋቲ አዳም አርአያ ዘኢይማስን ዘቦቱ በአርአያ ዘይማስን ተነሥተ ::

ወትእዛዛተ ጽድቅ በወንጌል መጠወ ዘውእቱ ጸዋዒ ዘበመንግሥት ንሕየው ተምሂረን ወበውእቱ ወንጌል ማዕሠረ ሰይጣን ተበትከ ከመ እሞት ሕይወተ ንትካፈል ወእምነ ኢያእምሮ ልቡና ንንሣእ ::

ውእቱሂ ከዊኖ ሰብአ ወልደ እግዚአብሔር አምላክ ዘተወልደ እምአዳም መዋቲ በእምሳሉ ተሠዊጦ ነሥእ ዘቀዳሚ ለተወልዶ ተፀንሰ ብእሲ ፡ ፡

ዘውእቱ አምላክ ዘበአማን ዘበነቢያት አቅደመ ተዐውቆ ወበሐዋርያት ተሰብክ ወእመላእክት ተአኩተ ወእምአበ ኩሉ ተሰብሐ ፡ ፡

ተሰቅለ በእንቲአን ወበመስቀሉ ኮነ ሕይወትን ጽንዕን ቤዛን ዘውእቱ ምሥጢር ኅቡዕ ፍሥሐ ዘኢይትዌዳዕ ዘቦቱ ፡ ፡

ኩሉ ነፍሰ ፍትወተ ሰብእ ያርኅቅ እምእግዚአብሔር ኢይክል ኪያሃ እንዘ ትፀውር ወትረ ዛ ይእቲ ስብሐት ፍቅር እምእግዚአብሔር ኢታሴስል ፡ ፡

ወበእለ ከናፍር ያታ ነገር ኢይትከሃል ጥንቁቅ ዘእምትካት ኅቡዓ ኮነ ይእዜሰ ክሠተ ምሥጢር ኮነ ለምዕመናን አኮ ከመ ይትረአይ አለ ከመ ይትሐለይ ውእቱ ዝንቱ መስቀል ወቦቱ ንትመካህ ከመ ንሰብሆ ፡ ፡

ወቦቱ እለ ይጠመቁሂ ምዕመናን ፍጹማን እምኩሉ ዘተነግረ ዘያስተርኢ ዘኢኮነ በአማን አድጋኑ ነፍሶሙ ፡ ፡

በዝንቱ እለ ትጸንዑሂ ሕቱ ርእሰክሙ አፅምሙ አዕዛኒክሙ ወእለ ይትረአያ አፀሩ አዕይንቲክሙ እለ በገሃድ ፡ ፡

ከመ ታእምሩ ፈቃድ ለኢየሱስ ክርስቶስ ወኩሎ ምሥጢረ መድኃኒትክሙ ብእሲ ወአንስት ቅዱሳት እለ ሀሎክሙ ውስተ ተመክሆ በእግዚአብሔር ፡
፡

ያጽምዕ ዘንተ ውስጡ ለሰብእ ክርስቶስ ጸመደነ ለኃበ አቡሁ አቅረበነ መጸኢ እምድኅረ ሐመ ወወሪዶ ውስተ ሲኦል ዘውእቱ ነፍሳተ ምውታን ዪወወ ለሕይወት ፡ ፡

ርእዮ ሞት እንዘ ይወርድ በሥጋ ንገዮ ወአምሰሎ ወቦቱ ከመ ያለምድ ውሂጠ ርእየ በላዕሌሁ ሥነ መለኮቱ ጸርሐ በቃል ዐቢይ እንዘ ይብል መኑ ውእቱ ዝንቱ ዘእምሥልጣንዮ ሰብአ ለቢሶ ሊተ ሞዓኒ ፡ ፡

መኑ ዝንቱ ዘእምሥልጣንዮ ተውህቦ ሥጋ ለኅጉል ይምስጠኒ መኑ ዝንቱ ዘምድረ ለብሰ ውእቱኬ ሰማያዊ ውእቱ መኑ ውእቱ ዝንቱ ዘበመስና ተወልደ ውእቱሰ ኢይማስን ፡ ፡

መኑ ዝንቱ ዘነኪር እምሕግዮ መኑ ዝንቱ ዘእምዚአየ ይዪውው መኑ ዝንቱ ዘበኃይለ ነደ እሳት ምስለ ሞት ይትበአስ መኑ ዝንቱ ዘሞዖ ለጽልመት መኑ ውእቱ ዝንቱ ስብሐት ሐዲስ ዘበአርአያዝ ተከልኦኒ ገቢር ዘእፈቅድ ፡ ፡

መኑ ዝንቱ እንበለ ኃጢአት ዘሞተ መኑ ዝንቱ ዘበብዝኃ ብርሃኑ ለጽልመት አዶሮ ዘኢኃደኒ ለእሊአየ እስፍን አላ ኩሎ ለጎበ ሰማያት ይስሕብ እለ ተውህባኒ ነፍሳተ

መኑ ዝንቱ ስብሐት ዘይከልእ ሥጋ ኢትማስን መኑ ዝንቱ ዘለኪፎቶ ኢይክል ምንትኑ ዝንቱ ዘየዓውዶ ስብሐት ዘኢይትአተትዝ ተኃጎልኩ እምዝንቱ ወእምእሊአሁ ዘአማስን በላዕሌሆሙ አልብየ ::

ዝንቱ ውእቱ ኢየሱስ ክርስቶስ ዘተሰቅለ ዘቦቱ ፀጋማይ የማነ ኮነ ወታሕታይ ከመ ዘላዕላይ ወደኃራይ ከመ ዘቀዳማይ ::

እመታን ተንሢኦ ሲኦለ ከይዶ በሞቱ ለሞት ደምሰሶ እምድኅረ ተንሥኦ በሣልስ ዕለት አእኩቶ ለአብ እንዘ ይብል ዘአምላክ ቃል ጥዕጡዕ ከመዝ ::

አአኩተክ አብ አኮ በዝንቱ ከናፍር ውዱዳት ወአኮ በልሳነ ሥጋ ዘባቲ ጽድቅ ወሐሰት ይወጽእ ወኢበዝ ቃል ዘበኪነ ነፍሰት ግብር ይትገበር አላ በዝኩ ቃል ::

አአኩተክ ንጉሥ ዘብክ ይትዐወቅ ለኩሎ ወእንተ ኢትትዐወቅ ወእንተ ኢትመጽእ ውስተ መናፍሰት ዘሥጋ ::

ዘበዕዝነ ሥጋ ኢተኃልፍ ወእንተ በዓለም ኢሀለወት ወበምድር
ኢትትኃደግ አላ በዝ ቃል ዘበላዕሌን መንፈስ ዘለክ ለባሕቲትክ ይትናገር
አብ ::

ዘኪያክ ያፈቅር አብ ወዘኪያክ ይዌድስ ዘቦቱ ኩሉ ማኅበረ ቅዱሳን
ፍጹማን ኪያክ ይጼውኡ አርክ ኪያክ አበ ኪያክ መጋቤ ወኪያክ ረዳኤ ::

አምላክ ኩሉ እስመ ለክ ኩሉ ወኩሉ ብክ ዘሀሎ ለክ ወአልቦ ካልዕ
ዘኢኮነ ዘዚአክ ለባሕቲትክ ዘሀሎክ ለዓለመ ዓለም ::

ያእምር እንከ ፍላዊ ዘኩሎ ነፍሳተ ምሥጢር እምድኅረ ጸለየ ለአብ ከመ
ታእምሩ ወትርአዩ አዐርግ ይቤ ኢየሱስ ::

ወበእንተዝ ይበል ፍላዊ መፍትወ እንከ ነገረ ኅቡዓት ከመ ታእምሩ መነሃ
ትሳተፉ ለቅድሳት ወለመኑ ትገብሩ ተዝካሮ በአኩቴት ::

ወዓዲ ይንገር እንዘ ይብል ንህነሂ አኃውየ ቦቱ ንፀወን ዘባሕቲቱ ሀብተ
ተምሂረነ ኪያሁ ንንሣእ ::

ዘይቤ ከመ የሀበነ ዘዓይን ኢርእየ ወዕዝን ኢሰምዐ ውስተ ልበ ሰብእ
ዘኢተሐለየ ዘአስተዳለወ እግዚአብሔር ለእለ ያፈቅርዎ ::

በክመ ይቤ ሙሴ ባዕዳንሂ ነቢያት ንህነሂ ቦቱ ተወኪለን ሎቱ ነሀብ ስብሐተ
ዘሎቱ ስብሐት ወጽንዕ ለዓለመ ዓለም ፡ ፡

አንገርጋሪ (ምልጣን) :-

ክርስቶስ ተወልዶ ክርስቶስ ተጠምቀ ወለደን ዳግመ እማይ ወእመንፈስ
ቅዱስ እመነ ኮነ ለፀሐየ ጽድቅ አስተርእዮቱ አማን መንክር ስብሐተ
ጥምቀቱ ፡ ፡

ምልጣን :- አማን በአማን መንክር ስብሐተ ጥምቀቱ ፡

አመላለስ :-

አማን በአማን መንክር ፣
መንክር ስብሐተ ጥምቀቱ ፡ ፡

ወረብ :-

ክርስቶስ ተወልዶ ክርስቶስ ተጠምቀ
ወለደን ዳግመ ወለደን ዳግመ እመንፈስ ቅዱስ ወማይ

እስመ ለዓለም :-

ሐረ ኢየሱስ እምገሊላ ኅብ ዮሐንስ ከመ ያጥምቆ በፈለገ ዮርዳኖስ ወወጺኦ
እማይ ተርኅወ ሰማይ መጽኦ ቃል እምደመና ዘይብል ዝንቱ ውእቱ ወልድየ
ዘአፈቅር ሎቱ ስምዕዎ ፡ ፡

ዕዝል :-

ሃሌ ሉያ ቀዳሚሁ ቃል ውእቱ ቃል ቃለ እግዚአብሔር ውእቱ ቃል ሥጋ ኮነ
ወተገሠ በሰሥጋ መንፈስ ዘኢይትገሠሥ ወዘኢይትለከፍ ዘምልዕልተ
ሰማያት ዘመልዕልተ ሥልጣናት ወገብረ መንጦላዕተ ሥጋ ሰብእ መዋቲ
ወረደ ዲበ ምድር ወአንሶሰው ውስተ ዓለም በበሕቅ ልሕቀ በጧ ክረምት
በዮርዳኖስ ተጠምቀ ፡ ፡

ምልጣን :-

ዘምልዕልተ ሰማያት ዘመልዕልተ ሥልጣናት ወገብረ መንጦላዕተ ሥጋ
ሰብእ መዋቲ ፡ ፡

ጽፋት :-

ሃሌ ሃሌ ሃሌ ሉያ ሃሌ ሃሌ ሉያ እስመ ሰምዓ ይቀውም ሎቱ አብ ናዛዚ
በርእየተ ርግብ ውስተ ምጥማቃት እንዘ ይብል ዝንቱ ውእቱ ወልድየ
ዘአፈውቅር ዘኪያሁ ሠመርኩ ይቤ ወበይእቲ ሥጋ እንተ ነሥኦ መድኅን
እምቅድስት ድንግል ኪያሃ ሠምረ አብ በሥጋ ምጽአቱ ፡ ፡

ተሣልክ ብለህ ዮም ፍሥሐ ኮነን ጽፋ.....

ተሣልክ እግዚአ ምድረክ ዮም ፍሥሐ ኮነ በእንተ ልደቱ ለክርስቶስ
ወበእንተ ጥምቀቱ ሃሌ ሉያ ሃሌ ሉያ ሃሌ ሉያ ኃዲጎ ተሰዓ ወተሰዓተ ነገደ
ቆመ ማእከለ ባሕር ገብአ ወወጽኦ በሰላም ፡ ፡

ምልጣን :-

ኃዲጎ ተሰዓ ወተሰዓተ ነገደ ቆመ ማእከለ ባሕር ገብአ ወወጽኦ በሰላም ፡ ፡

ዘማእከለ ባሕር ፡ አቡን :-

ሃሌ ሉያ ሃሌ ሉያ ሃሌ ሉያ ሃሌ ሃሌ ሉያ ነአምን በአብ ወነአምን በወልድ
ወነአምን በመንፈስ ቅዱስ እማርያም ዘተወልደ አፍቂሮ ኪያነ መጽኦ ኃቤነ
ዘነቢያት ሰበኩ ለነ በዮርዳኖስ ተጠምቀ ከመ ይፈጽም ኩሎ ሕገ
ወአስተርኣየ ገሃደ ፡ ፡

ምልጣን :-

በዮርዳኖስ ተጠምቀ /ጣ/ ፈጹሞ ሕገ ወክስተርአየ ገሃደ ::

ቅን :-

እምሰማያት ወረደ ወእማርያም ተወልደ ከመ ይሥዓር መርገማ ለሔዋ ዲበ
ዕፅ ተሰቅለ በሠላሳ ክረምት በዮርዳኖስ ተጠምቀ ዘነቢያት ሰበክዎ
ወክስተርአየ ገሃደ

ሰላም :-

አርእየነ እግዚአ ሣህለከ /ተሣሃልከ እግዚአ ምድረከ/የም ፍሥሐ ኮነ
በእንተ ልደቱ ለክርስቶስ ወበእንተ ጥምቀቱ ሃሌ ሉያ ሃሌ ሉያ ሃሌ ሉያ ኃዲጎ
ተሰዓ ወተሰዓተ ነገደ ቆመ ማእከለ ባሕር ገብአ ወወጽአ በሰላም ::

ምልጣን :-

ኃዲጎ ተሰዓ ወተሰዓተ ነገደ ቆመ ማእከለ ባሕር ገብአ ወወጽአ በሰላም ::

መረ/አመላለስ/ :-

ኃዲጎ ተሰዓ ወተሰዓተ ነገደ ፣

ማእከለ ባሕር ቆመ ማእከለ ባሕር ::